



# STINAPA TA INFORMA

## PASADIA DEN SALIÑA

Tur luna ta hasi un konteo di e flamingonan di Boneiru. Kolaboradornan di e departamentu di Maneho di Medio Ambiente i Naturalesa di DROB ta konta den e área nort di Boneiru, esnan di STINAPA ta konta den parti sùit, i e empleadonan di Cargill Salt Bonaire ta konta e flamingonan riba nan tereno i den e saliñanan. E datonan aki ta ser publiká tur kuartal den “MAKUBEKÈN”. Pero no tin mag di saka konklushon definitivo for di e sifranan aki te pa bisa ku ta bai bon òf malu ku e flamingonan. P’esei e fluktuashon pa luna ta muchu grandi. Kòrda ku tin masha hopi “tráfiko aéreo” di flamingo entre Boneiru i Benesuela. E tempu i e kantidat di kuminda na kada banda tin masha hopi influensha riba e kantidat di flamingo riba nos isla. E kantidat di e paranan aki ta varia entre 1500 i 6500 riba kada sierto momentu. Pero riba un averahe tin 3500. Pero e importansha di e kolonia di flamingo ta muchu mas grandi ku e sifranan aki ta laga bo pensa. Pasobra di e 20.000 flamingo ku ta biba den e área di Karibe sur, mayoria a sali for di webu riba e pida baranka aki. Den Gotomeer i den e saliñanan di Washington Slagbaai National Park na yanüari último tabatin 372 ehemplar, na febrüari 529, i na mart 697. Den e parti sur, pues riba tereno di Cargill i alrededor di Lac, a konta den e mesun lunanan respektivamente 2313, 2660 i 3059 flamingo. Den esaki tabatin den febrüari 741 i den mart 1157 flamingo hóben (Chogogo). Por dedusí anto ku den e lunanan aki sentenáres di puitu a nase. E nèshinan di flamingo ta konsistí di un seritu di lodo di 15 pa 35 centimeter di haltura. Pa kada nèshi tin solamente un webu. E webunan ta midí masoméno 9 centimeter, i ta dura masoméno un luna pa nan brui. Por rekonosé e chogogonan fásil na nan koló shinishi. Hopi biaha nan ta pará huntu bou di vigilansha di algun para adulto. E situashon ta laga bo pensa riba un pasadia. Ainda no ta konosí si e adultonan ta mayornan di e paranan òf no, i kiko nan funshon ta eksaktamente. Ta nan ta guia e pasadia? Nan ta protehá e pasadia? Òf nan ta hasi tur dos pareu? Ainda nos no sa. Tambe ta un misterio ainda kon e mayornan por haña nan propio yu den e multitut ei. Pasobra esei ta nesesario pa kria e yunan. Asina tur kos ku nos ta opservá ta lanta otro pregunta. Esei ta lokual ku ta hasi naturalesa asina fasinante. *Skirbí pa Departamento di Naturalesa i Medioambiente, DROB.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESAS



**Traha huntu na un desaroyo duradero pa Boneiru**